

08. juli 2020

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Kalaallit Nunaanni ikiaroonartumik aanngajaarniutinillu pinerluttoqartarnera akiorniarlugu annertusisamik iliuseqarnissaq, nunatsinni politiit amerlineqarnissaat aammalu suliassaqarfimmut tassunga amerlanerusunik aningaasaliisoqarnissaq anguniarlugu Naalackersuisut Naalagaaffiup oqartussaasuinut saaffiginneqqullugit peqquneqarnissaannik Inatsisartut aaliangiiffigisassaattut siunnersuut.

(Inatsisartunut ilaasortaq Erik Jensen, Siumut)

Tungavilersuut:

Sallunerussagunangilaq oqassagutta Nunatsinni ajornartorsiutit annerpaartaat ilagilluinnaraat, inuiaqatigiinni ikiaroonartumik aanngajaarniutinillu atuivallaarnerujussuaq. Tamannalu inuiaqatigiinnut minnerunngitsumik meeqqanutinuusuttunullu annertunerusumik sunnuteqarnerluleraluttuinnartoq kisitsisitigut takussutissartaqarpoq.

Tamatumunnga aamma ilanngullugu uppersarnerqarsinnaavoq Inatsisartuni ilaasortaq Sofia Geisler, Inuit Ataqatigiinnersup §37 nr. 353, 2019-imeersumi Naalackersuisunut apeqquteqaataani ersermat, nunatsinni hashpsykoseqalernertik peqqutigalugu DIH-ip napparsimavissuanut unitsinneqartartut amerlatsikkiartorsimanerat. Naalackersuisuniillu akissuteqaammi maluginianngitsuugassaangilaq, hashpsykoseqalernertik peqqutigalugu unitsinneqartartut ukiuni kingullerni inuusutsikkiartuinnarsimanerat. Kisitsisillu 2019-imoortut takutippaat unitsinneqarsimasut 50%-ii (tassa affaat) tassaasut inuusuttuaqqat 15-iniik 20-inut ukiullit.

Taamaammat ikiaroonartumik aanngajaarniutinullu akiuvallaarnerujussuup akiorneqarnissaanut piaarnerpaamik annertusisamillu suleqatigiissuteqartariaqarpugut. Ilaqtariippassuimmi minnerunngitsumillu meerarpassuit inuusuttullu sequtserneqarnerat mumisilluinnartariaqaratsigu - suleqatigiilluta.

Aammattaaq innersuussutigissavakka uanga nammineq Naalackersuisunut §37 nr. 24, 2020-imi apeqqutigisimasama akissuteqaateqarfigineqarsimani.

Politiit 2018-imut ukiumoortumik nalunaarutaanni (2019-imoortoq suli saqqummersimanginnami) takuneqarsinnaavoq nuna tamakkerlugu 59,6 kg hash arsaarinnissutaasimasoq.

Politiillu nalunaarutaanni maluginiagassaavoq illoqarfiit ilaanni arsaarinnissutit annikitsuarsuusarnerat, naak innuttaasut oqariartuutigigaluaarat illoqarfimmini ikiaroonartoq annertuumik atugaallunilu ajornartorsiutaasoq. Assersuutigisinnaavarput Maniitsumi taamaallaat 41,10 gram, Nanortalimmi 623 gram, Qeqertarsuami 96,29 gram, Qasigianguani 1,50 gram, 2018-imi arsaarinnissutaasimammata. Isumaqarpungalu tamatumap ersersikkaa ikiaroonartumut akiuiniarnermut suliniutit suli annerujussuusariaqartut.

Nuannaarutigisassaavoq piffissami sivitsortumi nunatsinni politiit aammalu anstalsbetjent-it akissaataat aaqqiiviginiarlugit suliat maanna aningaasaliiffigineqarlutik aaqqiiviginiarneqarmata. Tassanilu Naalakkersuisut aammalu nunatsinniit folketing-imi ilaasortaaitagut ilaasortaasimasullu sulilluarsimanerat qujanarutissaavoq.

Kisiannili isumaqarpunga pingaarutilerujussuusoq aamma politiit amerlassusissaat (normering-it eqqortut) aallaavigalugit inissiisoqartariaqartoq. Tassami tusartarparput illoqarfinni assigiinngitsuni ilaatigut politiit suliainnut angummassinnaannginnamik, suliatic tulleriatariaqalersaraat. Ikiaroonartumillu arsaarinnissutaasartut annertunerulissappata kiisalu inuiaqatigiinni aserorterisut pineqaatissinneqassappata taava politiit anngiortumik ikiaroonartumik akiuiniarnermut sulisut aammalu taakkua atortorissaarutissaat suli annerujussuusariaqartut. Illoqarfiimmi aaliangersimasuinnarni akiuiniarneq killilerujussuarmik sunnuteqartarmat.

Ilisimaneqartutuut qallunaat naalagaaffiata politiinut tunngassuteqartut suli tamakkiisumik oqartussaaffigai. Taamaammat matumuuna inatsisartuni Naalakkersuisut qallunaat inatsisinut atuutsitsinermit ministerianut saaffiginnissuteqarnissaannik peqquneqarnissaat siunertaralugu qulequttamik imaattumik inatsisartunut suliassanngortitsivunga.

Siunnersuutip aningaasatigut allaffissornikkullu pisortanut kinguneqaatissai
Aningaasatigut kingunerisassai naatsorsuutigineqarput qaammat ataaseq sulinermit A/C-erimik ataatsimik nalinganik annerunaviannngitsoq, tamanna 42.000 kr.-inik missaanik naleqassassoq.

Siunnersuutip namminersorlutik inuussutissarsiortunut allaffissornikkut aningaasatigullu kinguneqaatissai

Soqanngilaq.

Siunnersuutip innuttaasunut allaffissornikkut aningaasatigullu kinguneqaatissai
Soqanngilaq.